

**Kalaallit Nunaanni illunut inissianullu Radon-ip qinngorneranut illersuutilersuinissamut periarfissanik misissuititsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup imarissavaa pisortat ingerlataanni illuni aamma naammineq illuni inissianilu pisortanit pigineqartuni arlalinni periarfissarsiornissaq. Kingusinnerpaamik 2023-mi ukiaanerani ataatsimiinnermi misissuinermit innersuussutit saqqummiunneqassapput.**

(Inatsisartunut ilaasortaq, Mariane Paviasen, Inuit Ataqtigiiit)

### **Akissuteqaat**

(Ineqarnermut Attaveqaasersuutinullu Naalakkersuisoq)

### **Siullermeerneqarnera**

Aallarniutigalugu Naalakkersuisut sinnerlugit, Inatsisartunut ilaasortaq Mariane Paviasen Inuit Ataqtigiiinneersoq aalajangiiffigisassatut siunnersuuteqarnera pillugu qutsavigerusuppara. Naalakkersuisuniit aalajangiiffigisassatut siunnersuummi tunuliaqutaasoq paasilluarparput; tassalu innuttaasut peqqissuunissaannik qulakkeerinninnissaq, inissianilu radon-eqassutsip inuttaasut peqqissususaannut ajornartorsiortitsisinnaanera pimoorunneqartariaqarnera isumaqataaffigaarput, pingaartumillu meeqqanut inuusuttunullu sullissiviit pimoorunneqartariaqartut isumaqataaffigalugu. Paasissutissiissutit Inatsisartunut agguanneqassapput.

Siusinnerusukkut radon-eqassutsimik uuttortaasoqarsimavoq, taakkunanilu ilaatigut Narsami Qaqortumilu illuni radon-eqassuseq qaffassissoq paasineqarpoq. Uuttortaanerit taakku 2001/2002-mi aamma 2003/2004-mi ingerlanneqarput, uuttortaanerilu paasineqarpoq, radon-eqassuseq sumiiffinnut taakkununga ajornartorsiortitsisinnaasoq. Tamanna tunngavigalugu Ineqarnermut Attaveqaasersuutinullu Naalakkersuisoqarfik najugaqarfinnut eqqorneqartunut radon-i pillugu paasititsiniaavoq, aammalu inissiani radon-imik qanoq iliorluni uuttortaasoqarsinnaanersoq, inissianilu qanoq iliorluni radon-ip appartinneqarsinnaaneraniq ilitersuusiortoqarluni.

Naalakkersuisoqarfik naliliivoq, inissianik nammineq pigisanik pitsanngorsaanissamut taarsigassarsititsisarnerit tapiisarnerillu atuuttut aamma radon-imut isumannaallisaalluni suliniuteqarnissamut tunngasuusut. Taamaasilluni tapersiinnissamut periarfissat, siunnersuuteqartup apeqqutigisai atuutereerput.

Kisiannili allanik suliniuteqarnissamut, tassungalu ilanngullugu maleruagassat erseqqissarneqarnissaannut, kiisalu Namminersorlutik Oqartussat illuutaanni suliniutaasimasut malitseqartinnissaannut pisariaqartitsisoqarsinnaanera Naalakkersuisunit ammaffigineqarpoq. Taamaattumik Naalakkersuisut sinnerlugit siunnersuutigissavara, pitsanngorsaanermit iluarsaassinermullu il.il. taarsigassarsititsisarnermi tapiisarnermilu

aaqqissuussinerit inissianik aningaasalersuisarnermut aaqqissuussinernik nalilersuinernut aallartinneqareersunut, 2022-mi aningaasanut inatsit pillugu isumaqatigiissummi aalajangiiffiqarsimasunut ilanngunneqassasut. Suliniutissanik allanik aamma maleruagassat pioreersut pillugit erseqqissaasoqarnissaannik pisariaqartitsisoqarnersoq paasisaqarnissaq siunertaavoq.

Tamanna tunngavigalugu Naalackersuisut allannguutissatut siunnersuummik imaattumik saqqummiussaqrput:

**”Naalackersuisut inissiani nammineq pigisani radon-imut isumannaallisaanermut atatillugu aningaasartuutissanut taarsigassarsititsinissamut periarfissanik pitsannguinnissamik peqquneqarnissaat, tamatumalu inissianut aningaasalersuisarnermut inatsisip iluarsaanneqarnerani tullermi, kingusinnerpaamik 2023-mi upernaakkut pisussami ilanngunneqarnissaa pillugu Inatsisartut aalajangiiffiqarsassaattut siunnersuut.”**

Matumuuna aalajangiiffiqarsassatut siunnersuut Inatsisartuni kajumittumik suliassanngorlugu tunniuppara.